

आकाशवाणी

खास-खास खबरां:-

किरण रिजिजू हौरें आखेआ ऐ जे सब्बै पार्टियां पच्छम एशिया च बनी दी स्थिति गी ध्यानै च रक्खदे होई सरकार आसेआ पुट्टी जा रदी सब्बै गैङ्ग्यें दे समर्थन दा भरोसा दोआ ऐ।

मंत्रीमंडल 2035 तोड़ी कार्बन दे फैलाव गी 47 प्रतिशत तोड़ी घटाने गितें पर्यावरण कार्यकारी योजना दे नमें प्रस्तावें गी मंजूरी देई दिती ऐ।

तेल-पैट्रोल सरबन्धी मंत्रालय नै ईंधन दी कीमतें च बाद्दे सरबन्धी खबरें गी अफवाह करार दिता ऐ ते लोकें गी हड़बड़ी च खरीददारी थमां बचने दी सलाह दिती ऐ।

CCPA नै होटलें ते रैस्टोरेंटें गी ग्राहकें उप्पर बाद्दू शुल्क लाने थमां मना कीता ऐ।

पच्छम एशिया च बने दा तनाजे च ईरान नै युद्ध समाप्त करने सरबन्धी अमरीका दे प्रस्ताव गी खारिज करदे होई जवाबी प्रस्ताव दिता ऐ।

SAFF Under-20 प्रतियोगिता च भारत दा मुकाबला पाकिस्तान कन्नै होग।



West Asia -Kiren Rejju

संसदीय मामले सरबन्धी मंत्री किरण रिजिजू हौरें आखेआ ऐ जे सब्बै पार्टियां पच्छम एशिया च बनी दी स्थिति गी ध्यानै च रक्खदे होई सरकार आसेआ पुट्टी जा 'रदी सब्बै गैङ्ग्यें दे समर्थन दा भरोसा दोआ ऐ- ओ पच्छम एशिया च बनी दी स्थिति बारे सरकार आसेआ कल नमीं दिल्ली संसद भवन दे अहाते च लग्गी दी सब्बै पार्टियें दी मीटिंग मगरा पत्रकारें गी सम्बोधित करा रदे हे। श्री रिजिजू हौरें मीटिंग च शामिल होने आहलें सब्बै मैम्बरें दा धन्नवाद करदे होई आखेआ जे सरकार नै विपक्षी लीडरें आसेआ पुट्टे गेदे सब्बै सोआलें दा परता दिता ऐ। इस मीटिंग दी अध्यक्षता राजनाथ सिंह हौरें कीती जेदे च गृहमंत्री अमित शाह- विदेशमंत्री एस. जयशंकर- तेल-पैट्रोल मंत्री हरदीप पुरी- संसदीय मामले सरबन्धी मंत्री किरण रिजिजू- JDU दे कार्यकारी अध्यक्ष संजय झा- कांग्रेस लीडर मुकुल वासनिक ते तारिक अनवर, CPIM दे संसद जॉन Brittas- समाजवादी पार्टी दे सांसद धर्मेन्द्र यादव ते होर केंई लीडर शामिल हे। सब्बै पार्टियें दी एह मीटिंग प्रधानमंत्री नरेन्द्र मोदी हुंदे आसेआ पच्छम एशिया च बनी दी स्थिति बारे सांसद च सम्बोधन मगरा लग्गी। अपने ब्यानै च प्रधानमंत्री हौरें आखेआ जे सरकार नै ईरान- इजरायल ते अमरीका बश्कार बने दे तनाजे कारण ईंधन सप्लाई- हैल ते होरनें

क्षेत्रें च असर गी घट्ट करने गितै रणनीति बनाने लेई 7 बाइख्तेयार ग्रुप स्थापित कीते न।



Cabinet Approves

मंत्रीमंडल नै 2035 तोड़ी कार्बन दे फैलाव गी 47 प्रतिशत तोड़ी घटाने गितै पर्यावरण कार्यकारी योजना दे नमें प्रस्तावें गी मंजूरी देई दिती ऐ। इनें नयें प्रस्तावें गी 2031 थमां 2035 बश्कार हासल करना तय कीता गेआ ऐ। इनें नमें प्रस्तावें च बिजली दी समर्थ बदाने ते रुक्ख-बूहटे लाइयै जंगलात दा इलाका बदाने बारे बी प्रस्ताव रक्खेआ गेआ ऐ।



Petrol -Rumours

तेल-पैट्रोल सरबंधी मंत्रालय नै ईंधन दी कीमतें च बाददे सरबंधी खबरें गी अफवाह करार दिता ऐ ते लोकें गी हड़बड़ी च खरीददारी थमां बचने दी सलाह दिती ऐ। मंत्रालय नै आखेआ ऐ जे मुल्खै कोल अजें बी 26 करोड़ टन कच्चा तेल रिफाईन होने आस्तै उपलब्ध ऐ। नमीं दिल्ली च तेल पैट्रोल ते कुदरती गैस सरबंधी मंत्रालय दी सह-सचिव सुजाता शर्मा होरें आखेआ जे पैट्रोल- डीजल दे भाएं च कोई बढ़ौती नैई कीती जा रदी ऐ। उनें अग्गे आखेया जे पिच्छले 25एं बरें च कोई ढाई लक्ख नमें PNG कनैक्शन दिते गे न ते कोई 2 लक्ख 20 जहार उपभोक्ताएं LPG थमां PNG च अपने कनैक्शन बदली दिते न।



Ramnavmi

पूरे भारत सनें जम्मू-कश्मीर च बी मर्यादा पुरुशोत्तम भगवान राम जी दे जन्म उत्सव दा त्योहार “रामनवमी” बड़े उत्साह कन्नै मनाया जा’रदा ऐ। चैत्र नराते दे समापन दा एह त्योहार धार्मिक आस्था ते सांस्कृतिक महत्व रखदा ऐ। राष्ट्रपति द्रोपदी मुरमू होरें पूरे देशवासियें गी “रामनवमी” दी शुभकामनां दितियां न। राष्ट्रपति मुरमू होरें अपने इक सनेह च आखेआ जे भगवान राम जी दी जीवन यात्रा असेंगी सार्थक जीवन जीने लेई सच्चाई- न्याय ते सदगुण दे रस्ते पर चलने लेई सुत्थरी बत्त दस्सदी ऐ।



CCPA- Bars Hotels- Restaurants

उपभोक्ताएं दे हक्कै दी राक्खी-हिफाजत करने सरबंधी केन्द्रीय प्राधिकरण नै होस्टलें ते रैस्टोरेंटें गी ग्राहकें उप्पर LPG ते ईंधन सरबंधी बाद्दू शुल्क लाने थमां मना कीता ऐ। CCPA नै आखेआ ऐ जे ओ इयै नेही कारवाइयें उप्पर नेइमी तक्क रक्खा रदा ऐ ते इस हुकम दी खिलाफवर्जी करने आहलें खिलाफ सख्त कीती जा। प्राधिकरण नै ए स्पष्ट कीता ऐ जे होटल ते रैस्टोरेंट दे मैन्यू च दस्सी गेदी कीमतें च उपयुक्त शुल्क गै लाए जाई सकदे न। CCPA नै ग्राहकें गी आखेआ ऐ जे होटल जां रैस्टोरेंट आसेआ लाए गेदे इस चाली दे कुसा बी शुल्क गी अदा नैई करन। उनें आखेआ ऐ जे ग्राहक इस सरबंधे च अपनी शकैत राश्ट्रीय उपभोक्ता हैल्पलाईन नम्बर - 1915 उप्पर जां NCH मोबाईल ऐप्प राएं दर्ज कराई सकदे न।



West Asia Conflict

पश्चिम एशिया च चला'करदियें संघर्ष विराम दियें कोशिशें गी इक्क तगड़ा झटका लग्गा ऐ। ईरान नै अमरीका आसेआ पेश कीते गेदे 15 शर्तें आहले प्रस्ताव गी खारिज करी दिता ऐ। ईरानी सरकारी मीडिया मुजब- तेहरान गी ए प्रस्ताव बचौलियें राय हासल होआ हा ते प्रस्ताव च मतियां मंगां हियां- इस'करियै इसी खारिज करी दिता गेआ। अमरीका दे प्रस्ताव च ईरान गी ओदे परमाणु कार्जक्रम गी घट्ट करने- मिसाइल समर्था घटाने- स्ट्रेट ऑफ हार्मुज गी परतियै खोलने- ईलाकाई हथियारबंद बलें गी समर्थन घट्ट करने ते महलेवार बंदिशें च ढिल्ल स्वीकार करने दी मंग कीती गेई ही। एदे परते च ईरान नै संघर्ष विराम तांई पंज शर्तें आहला प्रस्ताव दिता। ईरान नै हमले ते हत्याएं गी तुरत रोकने- भविक्ख च फौजी कारवाइ नैई करने दी गारंटी देने- जंग होए दे नुकसान दा भुगतान करने सनें होर मंगें गी मनने दा प्रस्ताव रखेआ ऐ। ईरान दे इक्क सीनियर अधिकारी नै सरकारी टी.वी गी दस्सेआ जे ईरान युद्ध उस्सलै गै खत्म करोग- जिस्सैल ओ आपु इसी खत्म करना ठीक समझोग ते ओदियां शर्ता पूरियां होगंन। उन्नै गलाया जे ईरान- अमरीका कन्नै सिद्दी गल्लबात च शामिल नैई ऐ।



Modi Global Popularity

अमरीकी डाटा एनालिटिक्स फर्म Morning Consult आसेया कीते गेदे ताजा वैश्विक सर्वेक्षण च प्रधानमंत्री नरेन्द्र मोदी होरें गी इक बारी फही दुनिया दे सारे शा लोकप्रिय नेता दा दर्जा हासल होआ ऐ। 2 थमां 8 मार्च बश्कार कीते गेदे इस सर्वेक्षण च दस्सेआ गेआ ऐ जे प्रधानमंत्री मोदी होरें वैश्विक नेताएं च मती महत्व आहली बढ़त बनाई रक्खी दी ऐ। प्रधानमंत्री मोदी होर 68 फीसद रेटिंग कन्नै सबनें थमां अग्गे न-जदकि Switzerland दे राष्ट्रपति Guy Permielin ते साउथ कोरिया दे राष्ट्रपति Lee Jae Myung होर दौनें 62 फीसदी रेटिंग कन्नै दुए थाहर उप्पर न।

अमरीकी राष्ट्रपति डोनाल्ड ट्रम्प हुंदी 39 फीसदी रेटिंग दर्ज कीती गई ऐ ते ओह पैहले 10 च शामिल नैई ऐन।



MEA Pakistan

भारत नै पाकिस्तान आस्सेआ इक्क बंदिश आहले आतंकवादी संगठन ते ओदे मिम्बरें दे समर्थन च जारी इक्क ब्यान गी पूरी चाल्ली खारिज करी दिता ऐ। बंदिश शुदा आतंकवादी संगठन कन्नै जुड़े दे न्यायिक मामलें पर पाकिस्तान आस्सेआ दिते गेदे ब्यानै दे सरबंथै च मीडिया दे सोआले दे परते च विदेश मंत्रालय दे प्रवक्ता रणधीर जायसवाल होरें जोर देइयै आखेआ जे भारत दे अंदरूनी मामलें चा ओदी न्यां आहली प्रक्रिया पर टिप्पणी करने दा पाकिस्तान गी कोई हक नैई ऐ। श्री जायसवाल होरें गलाया जे एदे च हैरानी आहली कोई गल्ल नैई ऐ जे इक्क ऐसा देस जेड़ा लम्मे चिरे सवां आतंकवाद गी समर्थन दिंदा आवा करदा ऐ- उन्नै हिंसा ते बेकरसूर लोकें दी हत्या गी सेई ठहराहंदे होई इस चाल्ली दा ब्यान दिता ऐ। प्रवक्ता नै गलाया जे पाकिस्तान गी झूठ ते बेबुनियाद गल्लां फैलाने बजाय अपने देसै च होआ करदे संजीदा ते सुनियोजित मनुक्खी अधिकारें दी लोआंघना पर सोच-विचार करना लोड़चदा ऐ। ध्यानजोग ऐ जे दिल्ली दी इक्क अदालतै आस्सेआ UAPA दे इक्क मामले च अलगाववादी आसिया अंद्राबी गी उम्र कैद दी सजा सुनवाएं जाने मगरा पाकिस्तान मती डंड रौली पाई ही।



SAFF Under-20 Championship

SAFF Under-20 चैम्पियनशीप च भारत दी मर्दे दी टीम अज्जे माले च पाकिस्तान खलाफ हाई बोल्टेज टक्कर कन्नै अपनी मुहिम दी शुरुआत करोग। पाकिस्तान ते

बंगलादेश दे कन्नै-कन्नै ग्रुप-बी च शामिल कीता गेदा ऐ ते भारत गी त्रैं टीमें दे इस
ग्रुप च सख्त शङ्कल दा सामना करना पवा'रदा ऐ- जित्थे हर अंक मता जरूरी ऐ।
शनिवार भारत अपने दुए मैच च बंगलादेश कन्नै मकाबला करोग।

<><><><><><>